

ԴԻՏՈՒԹՅԱՆ ՀԱՐՑԵՐԸ ՄԱՏԹԵՈՍ ԶՈՒՂԱՅԵՑՈՒ ԱՇԽԱՏՈՒԹՅՈՒՆՆԵՐՈՒՄ

Մ. Հ. ԵՐԱՆՈՍՅԱՆ

XIV դ. վերջի և XV դ. սկզբի մատենագիր Մատթեոս Զուղայեցին ուրույն տեղ ունի հայ միջնադարյան մատենագրության մեջ ինչպես թողած հարուստ մատենագրական ժառանգությամբ, այնպես էլ սոցիալ-տնտեսական երեւոյթների բազմակողմանի ու խոր վերլուծությամբ:

Զուղայեցին իր բեղմնավոր գիտա-մանկավարժական գործունեության ընթացքում անդրադարձել է նաև գիտության և հավատի փոխհարաբերության խնդրին, որը ժամանակի գիտական մտքի առաջ ծառացած կարևոր հարցերից մեկն էր: Նրան հաջողվել է միաժամանակ պարզել գիտության և հավատի գործունեության ոլորտը: Իր նախորդների հետևությամբ Զուղայեցին ևս գտնում է, որ աստվածաբանության բնագավառը մտքին անհասանելի է, իր իսկ բառերով ասած՝ այն «վեր է քան զմիտս»¹ և դրան հասնելու բանալին հավատն է: Նա գրում է. «Թէպէտ հաւատով ճանաչեմք զնա, այլ ոչ կարեմք մտաւք մերովք քննել զնա»²: Պարզվում է, որ «մտօք անզննելի» ու «աչօք անտեսանելի» այդ գերզգայական աշխարհը քրիստոնեական հավատի գործունեության օբյեկտն է, որտեղ, Մ. Զուղայեցու պատկերացմամբ, գիտական իմացությունն ու բանական ճանաչողությունն անելիք չունեն: Արարչի գոյությանը պետք է հավատալ առանց որևէ քննության ու հետազոտության: Ուստի, այստեղից հարց է առաջանում. եթե իմաստութիւն ոչ հասուցանէ ի հաւատս, ապա ձրի դատիմք ընդ իմաստութեան»³: Առաջադրված խնդրի պատասխանում Զուղայեցին գրում է. «Զի յաստուած երիս իրս գոյ, նախ՝ էութիւն աստուծոյ, բ. ներածութիւն»⁴: Այնուհետև նա նկատում է, որ վերջինս լինում է երկու տեսակ. «Մին ներգործութիւն բնութեան է ընդ որում ծնունդ է և բխումն: Եւ երկրորդ՝ ներգործութիւն յայլ աւտարս զբնութիւն արարածոց»: Ըստ Զուղայեցու, այս երկրորդ «ներգործութիւնը» գիտության, իմաստության ուսումնասիրության օբյեկտն է: «Արդ,— գրում է նա,— իմաստութիւն կարէ հասանել յերկրորդ ներգործութիւն, զի եղեալ են, իսկ անեղն էութիւն և ընդ նմին ներգործութիւն ո՛չ հասանէ իմաստութիւն... վասն որոյ և երկուցն ցանկամք և վասն այսորիկ իմաստասէրքն անմեղադրելիք են...»⁵: Վերոնշված հարցադրման ու նրա պատասխան-լուծման գիտական կարևորությունը կայանում է նրանում, որ Զուղայեցին, փաստորեն «ճշմարտութեան երկվութեան» տեսությամբ փորձել է ապացուցել իմաստության անհրաժեշտությունը, ցույց տալ գիտության ուսումնասիրության բնագավառը: Նա գտնում է, որ եթե հավատն անհրաժեշտ է արարչին ճանաչելու համար, ապա իմաստությունը՝

¹ 2002 Մ. Մաշտոցի անվան մատենադարան, ձեռ. № 6607, էջ 368բ:

² 26ա. № 6847, էջ 273ա:

³ 26ա. № 2519, էջ 252բ:

⁴ Նույն տեղում:

⁵ Նույն տեղում:

«բնութիւն արարածոց»։ Այս խնդրում Զուղայեցին հետևողականորեն լար-
գացրել է իր ուսուցչի՝ Գր. Տաթևացու հայացքները։ Տաթևացին անդրադառ-
նալով գիտության և հավատի բնագավառներին, ընդգծել է, որ «գիտության
առարկան բնությունն է, նրա երևույթներն ու օրինաչափությունները, իսկ
հավատը չպետք է և չի կարող խառնվել գիտության գործին, Հավատի բնա-
գավառը գերբնական, աստվածային, դոյացությունների ճանաչումն է»⁶։ Զու-
ղայեցին գիտության օբյեկտի, նրա ուսումնասիրության առարկայի պարզա-
բանման խնդիրը չի սահմանափակել վերոնշվածով։ Իր հետագա ուսումնա-
սիրությունների ընթացքում նա ավելի հանգամանորեն է անդրադարձել գի-
տության հետազոտության բնագավառի, նրա դերի կարևորությանն ու այլ
հարցերի։ Նրա տեսական գրույթներում որոշակիորեն ընդգծվել է այն առա-
ջադիմական միտքը, որ գիտությունը, բանական իմացությունը հնարավորու-
թյուն են տալիս հասկանալու բնության և հասարակության զարգացման
բազմաթիվ կողմեր։ Աշխարհի ճանաչողության հարցում Զուղայեցին մեծ դեր
է հատկացնում բանականությանը։ Նա իրավացիորեն նկատում է, որ մարդիկ
բնության առարկաների, իրերի ու երևույթների վերաբերյալ գիտելիքներ ձեռք
են բերել բանականության միջոցով։ Բանականությունն է, որ, ըստ Զուղա-
յեցու, մարդուն հնարավորություն է ընձեռել թափանցելու բնական ու հա-
սարակական երևույթների մեջ, պարզել դրանց գաղտնիքները։ Նա գրում է.
«զի մարդիկ ունենին բնական իմաստ, որովք զբնութիւն արարածոց զտին և
զշրջան լուսավորացոյ նմանապէս և զանազան արուեստս նովին քննութեամբ
իմացան և զարարիչն ամենայնի»⁷։ Այստեղ գնահատելին այն է, որ Զուղա-
յեցին բնական ու հասարակական երևույթների ճանաչումը համարձակորեն
վերապահում է բանականությանը։ Նա այն համոզմանն է, որ մարդկային
միտքը զարգանում է պրպտումների և որոնումների հարատևության ըն-
թացքում։ Նրա ընկալմամբ՝ բանական ջանքերի ու ձգտումների շնորհիվ են
հարստանում մարդկանց գիտելիքները շրջապատող աշխարհի վերաբերյալ,
որի խորն ու բազմակողմանի իմացությունը հսկայական օգուտ է բերում հա-
սարակությանը։ Զուղայեցին գրում է. «Եւ քանզի բնական է մարդոյ զե-
ռեալ յիմաստս, որպէս տունկ ի յաճումն։ Վասն յորոյ յո՞ր քան յարի ի բան
ինչ փութացուցանէ հասանելն ընդ մին ի կատարումն, որով և իմաստունքն
ճոխացան։ Եւ յայսմանէ բազում շահ դոյ ի մեզ»⁸։ Վերջին հանգամանքն էլ
պայմանավորում է այն իրողությունը, որ Զուղայեցին միջնադարում բնու-
թյան ուսումնասիրության պահանջ է առաջադրում։

Հատկանշական է, որ նրա ուսմունքում բնության բովանդակության բա-
ցահայտման պահանջն ինքնանպատակ չէ։ Զուղայեցին իրավամբ նկատում
է, որ մարդիկ բնական ու հասարակական երևույթների բաղում հատկություն-
ների և հատկանիշների վերաբերյալ ձեռք բերած գիտելիքներն օգտագործում
են իրենց առօրյա գործունեության ընթացքում։ Այսպես, օրինակ, նա գրում
է. «Զերկրի յատկութիւն, և զշրոյ ուսանելով ո՛չ մեղանշեմք, գի ո՛չ թէ ջանամք
զնոյն ստեղծանել, այլ զստեղծեալն քննելով առ ի յազտաւետութիւն մեզ
ուսեալ ինչ ի նոցանէ, սոյնպէս եւ տոմարն... որ է շրջան արեգական լուսնի

⁶ «Բանբեր մատենադարանի», հ. 6, 1962, էջ 88—89։

⁷ Զեռ. № 5769, էջ 53ա։

⁸ Զեռ. № 6847, էջ 263ա—բ։

և զթիւ տարւոյն, որով կարասցուք գիտել զշահն սոյնպէս զԴ. եղանակս և ի նոսա վարել և հնձել»⁹, ինչպես պարզվում է, Զուղայեցին բնության ուսումնասիրության կարևորությունը, նրա անհրաժեշտությունը կապում է հասարակական արտադրական պահանջմունքների հետ, որը, հիրավի, ուշագրավ կուհում է միջնադարի պայմաններում:

Բնության օրինաչափությունների բացահայտումը նրան հետաքրքրել է ոչ սոսկ գիտելիքներ ձեռք բերելու իմաստով: Զուղայեցին առաջին հերթին քննում է այն հարցը, թե բնական ու հասարակական երևույթների բազում հատկությունների ու հատկանիշների վերաբերյալ ունեցած իմացությունը ինչպես է վերածվում պրակտիկայի, դրանք ինչպես են ծառայում հասարակությանը: Ըստ նրա՝ գիտությունը ինքը «բարւոք գործոց է», ուստի և նրա նվաճումները պետք է օգտագործվեն հասարակության բարօրության համար միայն: Նա գրում է. «զի ամենայն գիտութիւն վասն բարոք գործոց է. արդ՝ եթէ ոք զիմաստութիւն ուսեալ և ի շար գործ հակի յիրաւի ո՛չ է գովելի նա, ղի զի՞նչ աւգոտոյ յարեգակէ, եթե ո՛չ տացէ զլոյս իւր, կամ գանձ ի ծածկելոյ, կամ աղբեր խցելոյ»¹⁰:

Զուղայեցին փորձում է գիտական միտքը դուրս բերել կրոնական ծանծաղուտից և այն մոտեցնել բնությանը: Նա իրավացիորեն նկատում է, որ մարդու գիտելիքները անմիջապես կախված են բնությունից, նրանում տեղի ունեցող փոփոխություններից. «Ուր ո՛չ հասանէ բնութիւն, նայե անդ գիտութիւն ո՛չ հասանէ»¹¹, — գրում է Զուղայեցին: Տեսական այս պրոբլեմին նա ավելի հանգամանորեն է անդրադարձել իր «Մեկնութիւն վեցօրէից» աշխատության մեջ: Այստեղ և այլուր նա գտնում է, որ բնության ուսումնասիրութեամբ ավելի է հարստանում մարդու գիտակցությունը և ձեռք բերում շրջապատը ճանաչելու նորանոր հնարավորություններ: Նա իրականությունը համարում է շանաչողության ամենահիմնական օբյեկտը: Նշված մեկնության մեջ Զուղայեցին գրում է. «Զի յիւրաքանչիւր բնութիւն հրահալելեացն իր ինչ եղեալ է աստուած, ղի ի նոցանէ ուսցուք իմաստս զանազան և նոքաւք աճեացուք ի գիտութիւնս և ի շնորհս...»¹²: Ասվածը համոզիչ դարձնելու նպատակով, նա նշում է ոսկու, արծաթի, պղնձի, երկաթի, անագի և զանազան թանկարժեք քարերի ու մետաղների ոչ միայն օգտակարությունը, այլև փորձում է բացահայտել դրանց բաղադրությունը¹³, ընդգծում առարկաների որակական առանձնահատկությունների բնութագրման կարևորությունը, որի համար պետք է դինվել գիտութեամբ. «Զի բաղում մեծամեծ բանք ուսեալք ո՛չ այնպէս ցանկամք, որպէս և վասն միոյ կորեկի գիտութեան»¹⁴:

Մատթեոս Զուղայեցին հանգամանորեն քննել է նաև բնությանը ներազդելու միջոցներն ու եղանակները: Գիտակցելով, որ նշված խնդրի լուծումը միայն կարող է իրականացվել գիտության, իմացության միջոցով, Զուղայեցին պահանջում է նախ՝ պարզել, թե ինչ է իմաստությունը և ապա՝ բնորոշել նրա դերն ու նշանակությունը հասարակական կյանքում: Նա գրում է.

⁹ Ձեռ. № 2519, էջ 129ա:

¹⁰ Նույն տեղում, էջ 87ա:

¹¹ Ձեռ. № 6287, էջ 76բ:

¹² Ձեռ. № 6847, էջ 318բ:

¹³ Նույն տեղում, էջ 318բ—319ա:

¹⁴ Ձեռ. № 2519, էջ 129բ:

«Նախ գիմաստութիւն գիտասցութ, եւ ապա թէ զի՞նչ է գործ իմաստութեան»։ Բայց քանի որ բազմատեսակ է «իմաստութիւն եւ հոմանուն», ապա «զամենայնսն արժան է գիտենալ մեզ»¹⁵։ Զուղայեցուն հայտնի են գիտության բաղմաթիվ ճյուղեր։ Ըստ նրա, նյութական աշխարհի յուրաքանչյուր կոնկրետ բնագավառը գիտական իմացության օբյեկտ է, մի առանձին ուսումնասիրութեան առարկա։ Արժեքավորն այն է, որ Զուղայեցին գիտութիւնների բազմատեսակութիւնը չի գիտում բացարձակ ձևով, այլ նկատում է դրանց «հոմանուն» լինելը, ներքին միասնութիւնը, այն, որ գիտութիւնները գտնվում են սերտ կապի ու փոխազդեցության մեջ։ Այստեղից էլ անհրաժեշտաբար առաջացել է գիտութիւնների դասակարգման խնդիրը, որը, ինչպես հայտնի է, ենթադրում է պարզել «բազմատեսակ ու հոմանուն» գիտութիւններից յուրաքանչյուրի առանձնահատկութիւնները, նրա ուսումնասիրութեան առարկայի յուրահատկութիւններն ու խնդիրները, բացահայտել գիտելիքների ներքին կառուցվածքն ու առանձին գիտութիւնների միջև եղած փոխկապվածութիւնը։

Անդրադառնալով վերոնշյալ կարևորագույն պրոբլեմին, Զուղայեցին նկատում է. «Եւ զի ամենայն իմաստասիրութիւն յերկուս բաժանի. ի տեսականն և ի գործնականն...»¹⁶։ Այնուհետև, անցնելով դրանցից յուրաքանչյուրի բնութագրմանը որպես գործնական իմաստութեան բնագավառի, օրինակ, նա նշում է «բժշկութեան արուեստն», իսկ տեսականի մեջ մտցնում «գիտութիւնը և հաւատը»¹⁷։ Նա գիտութիւնները դասակարգելիս հարազատ է մնացել Դավիթ Անհաղթի տեսական սկզբունքներին։ Ինչպես հայտնի է, գիտութիւնների դասակարգման անհաղթյան սխեմայում, որպես գործնական իմաստութեան բնագավառ, ընդգծված է արհեստագործութիւնը՝ իր ամենատարրեր ճյուղերով։ Այսպես, օրինակ, հյուսնութիւնը, դարբնութիւնը, նկարչութիւնը, քանդակագործութիւնը, պրակտիկ բժշկութիւնը և այլն, որոնք, ըստ նրա, չեն պահանջում գիտական որոնումներ և առանձին գիտելիքներ, ընկալվում են մեխանիկորեն, փորձով և ունակությամբ։ Սակայն Անհաղթի պատկերացմամբ՝ «արուեստներից» յուրաքանչյուրի տեսական գրույթները մշակվում են փիլիսոփայութեան կողմից¹⁸։ Այսպիսով, ինչպես տեսնում ենք, Դավիթ Անհաղթը գիտական իմացութեան բնագավառում հսկայական տեղ է հատկացրել փիլիսոփայութեանը։ Տեսական իմացությամբ ղեկավարւած անհրաժեշտութիւնը Անհաղթի մոտ մղվում է առաջին պլան։ Առաջնորդվելով նշված գրույթներով Զուղայեցին ևս առանձին կարևորութիւն է տալիս ուսուցմանը, դաստիարակութեանը, տեսական գիտելիքներով զինվելու անհրաժեշտութեանը, որը, անշուշտ, ժամանակի համար ուներ շափազանց մեծ նշանակութիւն։ Ըստ Զուղայեցու, գիտելիքները լինում են տարբեր տեսակի՝ բարոյական, բնական, կրթական և այլն։ Հետաքրքիր են նրա ըմբռնումները բնական և կրթական իմացութեան վերաբերյալ։ Զուղայեցու պատկերացմամբ «բնական իմաստութիւնը» մտքի կարողութիւն է, մարդու բնատուր ընդունակութիւն։ Նա գրում է. «առաջին իմաստութիւն է բարոյական... երկրորդ՝ իմաստութիւն կոչի բնական հնարք մարդոյն, զոր ունին ի ծննդենէ, որպէս

¹⁵ Ձեռ. № 2229, էջ 158բ։

¹⁶ Ձեռ. № 2519, էջ 36բ։

¹⁷ Նույն տեղում։

¹⁸ С. С. Аревшагян, Формирование философской науки в древней Армении (V—VI вв.), Ереван, 1973. стр. 93.

յայտ է ի տղայսն, դի խորհին խորհուրդ ինչ և գործեն գործ ի՞նչ, բայց ամենայն անկատար. դի ոչ ունին գործիք»¹⁹:

Բնական իմաստությունը, ըստ Զուղայեցու, բանական հնարավորություն է, որը մարդու մոտ դրսևորվում է վաղ հասակում: Նա նկատում է, որ երեխան կատարում է որոշ գործողություններ, սակայն դրանք գիտակցված արարքներ չեն: Այդ գործողությունների միջոցով հնարավոր չէ հասնել բնության իրերի, առարկաների ու երևույթների էության ճիշտ ըմբռնմանը: Զուղայեցին դրում է, որ անսխալ ճանաչման հասնելու համար մարդու բնատուր ընդունակությունները ժամանակի ընթացքում պետք է կատարելագործվեն: Այդ դործում հիմնական գերը սլատկանում է կրթությանը, ուստի բնության ճանաչման խնդրում Զուղայեցին կարևորությունը տալիս է «կրթական իմաստութեանը»: Նա գրում է. «Իմաստութիւն կոչի կրթական, որպէս յորժամ ուսանիմք զամենայն ինչ արուեստ, զբան և զգործ, զորս տեսանեմք՝ որպէս ի ի սանմանն բացահայտի՝ մտաց և հանճարոյ ընդունակ»²⁰: Մեջբերված հատվածից պարզվում է, որ ուսանելու ընթացքում դրսևորվում են անհատի ստեղծագործական ունակությունները: Այլ կերպ՝ ուսումնառությունը միաժամանակ ստեղծագործական պրոցես է, որի ընթացքում դրսևորվում են մարդու ընդունակությունները: Դրանք, ըստ Զուղայեցու, ինչպիսի պայմաններում էլ դրսևորվելիս լինեն, երևույթների էության մեջ թափանցելու հատկություն են, կարողություն: Ուստի, ընդունակությունների անընդհատ զարգացումն ու կատարելագործումը գիտական իմացության գլխավոր և անհրաժեշտ պայմանն են, քանի որ դրանով նոր հնարավորություններ կընձեռվի ավելի բազմակողմանիորեն բացահայտելու ուսումնասիրվող օբյեկտի էությունը: Առաջնորդվելով նշված գաղափարներով՝ Զուղայեցին իր գիտա-մանկավարժական գործունեության ընթացքում բազմիցս անդրադառնում է կրթական իմաստության դերին ու նշանակությանը, շեշտելով գիտելիքների՝ «բազում ուսուցմամբ» գոյանալու իրողությունը:

Նշված խնդիրների պարզաբանման տեսակետից հետաքրքիր է նրա հետևյալ միտքը. «Իսկ իմացումն, որ է իմաստութիւն, գ. է. նախ՝ բնական իմաստութիւն, որ ընդ ստեղծանելն լինի ամենայնի, երկու՝ կրթականն, զոր առնումք աշխատանք, երեք՝ շնորհական...»²¹: Այնուհետև Զուղայեցին անցնում է դրանց բնութագրմանը: Նա գրում է. «Բնական իմաստութիւն ո՛չ կարէ որոշել զիսկապէս բարին, նաև զչարն, քանզի ի վեր երևոյթն հայի: Եւ չարն բաղում յատկութիւն ունի: Նախ՝ զի հոմանուն բարի կոչի և ոչ ունի զիրն բարի: Երկրորդ՝ զի սկիզբն բարի է և ի կատարածն՝ չար: Երրորդ՝ զի պաճուճեալ է բարեան և ի ներքոյ է չարն: Զորրորդ՝ մարմնոյ քաղցր է և հոգոյ դառն»²²:

Զուղայեցու հայացքից չի վրիպել այն հանգամանքը, որ երբեմն բնական և հասարակական երևույթների ձևն ու բովանդակությունը չեն համապատասխանում: Նա իրավացիորեն նկատում է, որ այդ երևույթներն ունեն արտաքինապես չդրսևորվող հատկություններ, և որ այդպիսիք քննելու համար պետք է թափանցել դրանց ներքին օրինաչափությունների մեջ: Զուղայեցին

19 Ձեռ. № 2229, էջ 158բ:

20 Նույն տեղում:

21 Ձեռ. № 6287, էջ 79ա:

22 Նույն տեղում:

միաժամանակ նկատում է, որ միայն բնատուր իմացությամբ հնարավոր չէ թափանցել բնական ու հասարակական երևույթների էության մեջ, ճանաչել դրանք: Ըստ նրա՝ մարդկային բնատուր ընդունակությունները պետք է զարգանան, կատարելագործվեն, այսինքն՝ բնության առարկաները և երևույթները ճանաչելու համար մարդը պետք է զինված լինի տեսական որոշակի գիտելիքներով, այլ կերպ՝ «թագաւորեալ լինի ի վերայ արուեստին իւրոյ բազում ուսմամբն»²³:

Նման հարցադրումներով Զուղայեցին փաստորեն ընդվզում է պլատոնյան բնածին գաղափարների իդեալիստական տեսության դեմ: Տեսական այս խնդրին Զուղայեցին անդրադառնում է նաև իր մեկ այլ աշխատության մեջ: Նա գրում է, որ ուսման միջոցով մարդիկ «Նախ կրթին զխամ միտս և զամենայն տգիտութիւն նորա ի բաց ընկենուն և ապա երեքին գիտութեամբ, որ է մարգարեական և առաքելական, և իմաստասիրական գիտությամբ շարմանայ, ամրանայ և ապա կարի գործս գործել...»²⁴: Այստեղ արժեքավոր է այն, որ, ըստ Զուղայեցու, մարդու «խամ» միտքը զարգացնելու և կատարելագործելու համար անհրաժեշտ է նաև իմաստասիրությունը:

Գիտությունները դասակարգելիս Զուղայեցին գրում է. «Իմաստութիւն կառավարութիւն քաղաքաց և տանց և գեղից, որպես թագաւորք, իշխանք և տանուտերք և այլք»²⁵, իր ուսուցչի՝ Գրիգոր Տաթևացու, նման նաև մարդու անձնական ու հասարակական տնտեսության կառավարումը համարում է գիտության առանձին ճյուղ: Նույն միտքը Զուղայեցու մոտ ձևակերպվել է. «աշտարակ շինելն արուեստ է, իսկ շէն պահելն՝ իմաստութեան դործ»²⁶:

Պատահական չէ, որ Զուղայեցին ավեր ու անկարգ է համարում այն «շէնն, որ ո՛չ ունի ձեռնաւոր և տանուտէր...» կամ «թէ իցէ ձեռնաւոր և տանուտէր, և ոչ սերմանեալ աշուն և գարուն...»²⁷: Նա առանձնահատուկ տեղ է հատկացնում մարդկանց տնտեսական-արտադրական գործունեությանը: Ըստ Զուղայեցու, նյութական բարիքների արտադրությունը, դրա կատարելագործումն ու զարգացումը, տնտեսական կյանքի կարգավորումը, «շէնի» գոյության անհրաժեշտ պայմանն են: Եվ ահա հասարակության տնտեսական այդ գործունեությունն է, որ Զուղայեցին իրավացիորեն համարում է գիտության առանձին ճյուղ, հետազոտության հատուկ բնագավառ:

Զուղայեցու պատկերացմամբ, գիտությունների աղբյուրը օբյեկտիվ իրականությունն է, բնության իրերը, առարկաներն ու երևույթները: Այլ կերպ՝ նա գիտությունները դասդասելիս հիմք է ընդունում դրանց՝ մարդուն ծառայելու եղանակը, վերջինիս ուսումնասիրության բնագավառն ու խնդիրները, որը, անշուշտ, գիտական որոշակի առաջընթաց էր: Նա նկատում է, որ մարդը իր բազմապիսի կարիքներին համապատասխան էլ ստեղծել է արտադրության տարրեր ճյուղեր, որոնց միջոցով բնության առարկաները մշակում և դարձնում է պիտանի: Ահա այս ստեղծագործական ունակությունների շնորհիվ է, որ մարդը Զուղայեցու պատկերացմամբ արարիչ է. «Գիտեալ է, զի մարգս գործ է ձեռինն աստուծոյ և ոչ թէ ոչ ինչ է անկար, այլ էութիւն իմն նման

23 Ձեռ. № 2519, էջ 36ա:

24 Նույն տեղում, էջ 86բ:

25 Ձեռ. № 2229, էջ 159ա:

26 Ձեռ. № 2519, էջ 34բ:

27 Նույն տեղում, էջ 150բ:

սյրարչին կարող դորոթեամբ և անձնիշխանութեամբ, որով կարողանայ բազում բարիս և շար յառաջ բերել»²⁸։ Մարդը արարիչ է առաջին հերթին իր գոյամիջոցներն արտադրելու տեսակետից, թեև այս հարցում հսկայական տեղ է հատկացվում բնությանը։ Զուղայեցու ըմբռնմամբ՝ արարիչը, բնությունը և մարդիկ ստեղծագործող են, սակայն տարբեր ձևերով ու մեթոդներով։ Նա դրում է. «դի երեք են արարիչ ըստ փիլիսոփային, աստուած և բնութիւն և արուեստն։ Աստուած յոչ էից. գոյացուցանէ եւ բնութիւն ի սակաւ հիւթոյ սերմանն, իսկ արուեստն ի բաղում նիւթոցն, որպէս հիւսն և ոստայնանկն...»²⁹։

Մատթեոս Զուղայեցին բաղմիցս անդրադառնում է նյութական արտադրութեանը, նրա պարզ տարրերի բնութագրմանը։ Նա նշում է, որ «գործոյսն ի մարմնական ի բաղում ինչ պիտոյանայ, որով գործն ի կատարումն ելցէ՝ նախ՝ ուժ ընդունակ և կարող այրն, որպեսզի կարասցէ զծանրութիւնս շարժել և յցանկութիւն կամացն լցուցանել։ ...Դարձեալ պիտոյանայ ճարտար միտք արուեստաւորին, որպեսզի զնիւթքն զայնոսիկ զհրաքանչիւր պատշաճն ի գէպ իւր ի գործածցէ՝ որպէս միտք ներկողին, զի գիտէ բաժանել զամենայն ներկան ի ձեռն նիւթոցն»³⁰։ Դատելով այս բացատրությունից՝ արտադրութեանը պայմանավորող առաջին անհրաժեշտութեանը աշխատուժի առկայությունն է, աշխատանքի առարկաների ու գործիքների ներդրմամբ։ Վերոբերյալ հատվածի շարունակության մեջ Զուղայեցին գրում է. «Դարձեալ պիտոյ է նիւթ պատրաստական, որպէս ոստայնանկն ոչ կարէ առանց մանածի զարուեստ իւր տնօրինել, սոյնպէս և հիւսն և դարբինն, զի հարկաւոր են գործոց իւրեանց։ Դարձեալ պիտոյանայ և գործիք արուեստաւորին, որով և զնիւթքն յառաջեալ գործիցէ՝ որպես ուրաքն և տապար հիւսանն և կռան դարբնին»³¹։ Իրականում Զուղայեցու մոտ ունենք նյութական բարիքների արտադրութեան պրոցեսն սկսելու անհրաժեշտ և գլխավոր տարրերի բնութագրում։

Գիտության հարցերի քննարկման ընթացքում Զուղայեցու առաջ կանգնած է եղել նաև տեսական և գործնական գիտելիքների փոխհարաբերության պրոբլեմը։ Այն հարցին «թէ լսելիքն օրինացն արդարացուցանէ» թե «առնելիքն», Զուղայեցին պատասխանում է. «պարտ է իմանալ, զի ամենայն իրաց չափող ժամանակաց գործոց մտաց տեսութիւն է և կամքն յարգարիչ է սոցա. վասն որոյ պարտ է զմիտսն հնազանդեցուցանել. նախ՝ ի ձեռն որոյ գործի ամենայն ինչ և զայս ուսանելն առնէ։ Եւ դարձեալ զի ուսանելն առաջին է և գործելն երկրորդ և ամենայն իրօք առաջինն պատուական է, քան զերկրորդն։ Եւ դարձեալ առանց գիտութեան գործն սղալ գտան բազում անգամ. եւ դարձեալ դի նախ տեսական և ապա գործնական և յայսմ ամենայնէ յայտ է թէ ուսանելն առաջինն է և պատուական, քան զգործն...»³²։

Ընկշտ է, տեսականի և գործնականի փոխհարաբերության խնդրին անդրադառնալիս Զուղայեցին առաջնությունը տալիս է տեսականին, սակայն միաժամանակ նկատում է, որ մտածողությունը երբեք չի կարող իմացության ճշմարտության չափանիշ լինել։ «Թէպէտ զուսանելն առաջին ասասցուք, բայց գործն ցուցանէ զուսումն. զի առանց գործոց ոչ ինչ են, զոր արինակ՝ արուեստ-

²⁸ Նույն տեղում, էջ 198ա։

²⁹ Նույն տեղում, էջ 185բ։

³⁰ Ձեռ. № 6847, էջ 336բ—337ա։

³¹ Նույն տեղում։

³² Ձեռ. № 2519, էջ 22ա։

տաւոր ինչ յորժամ զարուեստն գործէ, յայնժամ շահի նմանէ, քան թէ ի մտին ունիցի. սոյնպէս և ամենայն ուսումն գիտութեան և առաքինութեան. թէ զոր-
ծէ՝ ապա առնու զշահ աշխատանաց ուսմանն, իսկ եթե ո՛չ առնէ ո՛չ ունի ինչ
վարձ, նա թեև տանջանա մեծ առնու գիտողն և ոչ առնողն, որպէս ասէ Ժա-
ռայն, որ գիտէ զկամս տեառն և ոչ պատրաստեսցէ առցէ գան բազում: Ուստի
յայտ է, թէ առնելիք արինացն արդարացուցին և ոչ լսելիքն»³³, Այստեղ Զու-
ղայեցին այն միտքն է առաջ քաշում, որ իմացութեան չափանիշ կարող են
լինել մարդկային գործունեությունը, պրակտիկան:

Մատթեոս Զուղայեցին ժամանակակիցներին անընդհատ խրախուսել է
սիրել գիտությունը, լուսավորությունը և դրանով սատարել ազգային մշա-
կութի առաջընթացը: Նա նկատում է, որ գիտությունը, իմաստությունը հա-
սարակության զարգացման կարևոր նախադրյալներից են: Զուղայեցու պատ-
կերավոր համեմատությամբ՝ ինչպես արգավանդ դաշտն է բազմապիսի բա-
րիքներ տալիս, այնպես էլ հանճարեղը, իմաստունը, կրթություն և դաստիա-
րակություն ստացած մարդը ընդունակ է բացելու բնությունն ու հասարակու-
թյունը ճանաչելու նոր հնարավորություններ: Նա գրում է. «...դաշտը նշա-
նակեն զգիտունս և զհանճարեղս, որք և նման դաշտի զանաղտն իմաստս
յառաջ բերեն»³⁴:

Այդուհանդերձ՝ նա միաժամանակ մատնանշում է այն բոլոր դժվարու-
թյունները, որոնք ընկած են գիտության զարգացման ճանապարհին: Այս
առումով ուշագրավ է նրա հետևյալ բացատրությունը. «Ուղեորք ի ճանա-
պարհս ընթանան բազում հակառակութիւն դիպի նոցա. արգելք ճանապարհի.
նախ՝ յորդախաղաց գետք, երկրորդ՝ լայնատարած ծովք, երրորդ՝ բարձրու-
թիւն լեռանց, որ աշխատանօք ընթացուի, չորրորդ՝ նեղ և անձուկ ճանապարհս
քարանձաւաց...»³⁵, Նույնպես էլ գիտության գաղտնիքները բացահայտելու
համար պետք են համառ կամք և անխոնջ աշխատասիրություն, որովհետև.
«եւ է, որ բարձր է իմաստութիւն գրոցն, որպէս լեռն և առանց աշխատանաց
առաքինութեան ո՛չ կարէ հասանել ի նա»³⁶:

Ըստ ամենայնի գնահատելով ուսման և լուսավորության անհրաժեշտու-
թյունը, Զուղայեցին ամենայն խստությամբ պահանջում է ուսուցանողից
«գիտուն լինել, զի զոր այլոց քարողէ զինքն ուսեալ լինի և թէ ոչ ինքն զինքն
նախատէ... զոր օրինակ՝ տգէտ բժիշկ ոչ կարէ զվերս մարմնոյ առողջացու-
ցանել, սոյնպէս և հոգևոր բժիշկն եթէ ոչ է գիտուն ոչ կարէ ապրեցուցանել
զհոգիսն»³⁷: Նա միաժամանակ անարգանքի սյունին է դամում բոլոր նրանց,
ովքեր, չնայած գիտուն են, սակայն դիտելիքները չեն ավանդում իրենց սա-
ներին: Նա գրում է. «զի գիտութիւն կորեալ է յայն, որ խնայէ, որպես ասէ
Սիրաք, իմաստութիւն ծածկեալ և գանձ աներևույթ, զինչ օգուտ են երկո-
քեանն: Լավ է անիմաստն, որ ծածկէ զտգիտութիւն իւր, քան զայն, որ իմաս-
տուն է և ծածկէ զգիտութիւն, առաւել շար է, քան զազահն, զի զգանձն նորա
յետմահուանն այլ յափշտակեն, իսկ գիտութիւն մարդոյ, որ ոչ բաշխէ ի կեն-
դանութեան իւրում և յետ մահուանն անհնար է յայլ անկանել»³⁸:

³³ Նույն տեղում, էջ 22ա—բ:

³⁴ Զեռ. № 6847, էջ 307ա:

³⁵ Զեռ. № 6287, էջ 84բ:

³⁶ Նույն տեղում:

³⁷ Զեռ. № 6607, էջ 427բ:

³⁸ Նույն տեղում, էջ 426ա:

Զուղայեցին բարձր է գնահատում իմաստութիւնը. «Զի սա է անկողնայտելի գանձ, որոյ ոչ ամուրք պիտոյ են և ոչ փախուստ ի թշնամեաց, ոչ անօր ոսկեղէնք և արծաթեղէնք և ոչ ծառայք, ոչ երկնչի ի բռնաւորաց...»³⁹:

Ուշագրավ է նրա այն պնդումը, թե իմաստութիւնը մեկ ազգի սեփականութիւն չի կարող լինել, այլ «կարէ խօսիլ» ամեն ազգի լեզուով՝ «ամենայն ազգաց հնար է մերձավորիլ»։ Քանի որ «բարի յիշատակ է մարդոյ առաւել քան զհազար դաւակ, գի թէ լինի բաղում ազգ որդի ուրուք ոչ կարէ սփռիլ յամենայն ազգ, իսկ իմաստութիւն յամենայն լեզուէ կարէ խօսիլ և ամենայն ազգաց հնարէ մերձաւորիլ, ապա գեղեցիկ է իմաստութիւն»⁴⁰:

Ճանաչողութեան գիտական բացահայտումը, ըստ Զուղայեցու, սկսվում է զգայութիւնից, որը առաջանում է մարդու զգայարանների վրա արտաքին աշխարհի ներգործութիւնից։ Նա բազմիցս անդրադարձել է զգայարանների դերին ու նշանակութեանը և ընդգծել դրանց բացառիկ կարևորութիւնը արտաքին աշխարհի ճանաչման գործում։ Զուգահեռ անցկացնելով մարդու, բնութեան և բնակավայրի (քաղաքի) միջև, Զուղայեցին գրում է. «Ղի սպասարք կարգեալ են ի քաղաքի բերել ի նա զամենայն ինչ. նմանապէս է ի մարդկան կարգեալ է աշքն ծառայէ, զի տեսանիցէ և ի ներքս ի միտքն տանի զկերպարն, զի ճանաչիցէ և ձեռն զի գործեսցէ զճաշակելիքն, զի մանրեսցէ և հոտոտելիքն և այլն»⁴¹:

Սակայն անհրաժեշտ է նշել, որ Զուղայեցու իմացութեան տեսութիւնը չի մնում զգայական ընկալման աստիճանում։ Նա իրավացիորեն նկատում է, որ բնութեան իրերի ու առարկաների էութեան մասին գիտելիքներ ձեռք բերելու համար մարդու զգայարանների հետ միասին անհրաժեշտ է նաև բանականութիւն, որովհետև «զայլոց տեսանէ աշքն և ինքն անգիտանա»⁴²:

Զգայարանների բանականութեան գործիքներն են, քանզի, «ի ձեռն աշացն տեսանեմք, ականջօք լսեմք, ըռնկամք հոտոտեմք, բերանով ճաշակեմք և ձեռք 20շափեմք և բանիւ խօսիմք ընդ միմեանս և խորհրդով իմանամք զճանդերձեալն և խորհիմք վասն վաղուի...»⁴³: Ընդգծելով զգայարանների դերը, Զուղայեցին միաժամանակ ընդգծում է մարդու խոսելու և խորհելու ունակութեամբ օժտված լինելու կարևոր պարագան։ Իսկ դա ամենամեծ բարեմասնութիւնն է, որով նա տարբերվում է կենդանական աշխարհից։ «...ղի լուսաւորքն նշանակեն զբանականութիւն մտաց մարդկան, զի որպէս լոյս ոչ շափի, սոյնպէս և բանականութիւն ոչ ի գիր անգանի և նա է բաժանարարն ի յայլ կենդանեաց...»⁴⁴: Նշանակում է, Զուղայեցու մոտ մարդկային ճանաչողութիւնը կանգ չի առնում միայն տեսնելու, զգալու, շոշափելու և հոտոտելու զգայական աստիճանի վրա, այլ, ըստ նրա, ճանաչողութեան գործում վճռականը բանականութիւնն է, խորհելու և մտածելու ունակութիւնը։ Նա գտնում է, որ արտաքին աշխարհի վերաբերյալ զգայարանների ստացած տվյալները «թափանցաբար» անցնում են մտքին, որտեղ մշակվելուց հետո

39 Զեռ. № 6847, էջ 268բ։

40 Զեռ. № 2229, էջ 262բ։

41 Զեռ. № 2519, էջ 58բ։

42 Զեռ. № 6607, էջ 120ա։

43 Նույն տեղում, էջ 130ա։

44 Զեռ. № 6847, էջ 325ա—բ։

նոր միայն հասնում ճանաչողությանը: «Հուր ասէ զհոգին բանական, ոչ վասն այրեցողութեան, այլ վասն բնութեան և թափանցութեան, զի որպէս հուրն անտեսանելի է, առանց նիւթոյ, վասն զի նուրբ է և պարզ էութիւն, սոյնպէս և հոգին անմարմին էութիւն է և որպէս հուրն թափանցաբար ըմբռնէ զնիւթն, այսինքն զերկաթ կամ զփայտ, բոլորն է ի բոլոր նիւթն և բոլորն իւրաքանչիւր մասն մարմնոյն»⁴⁵:

Այնուհետև Զուղայեցին իրավացիորեն նկատել է, որ գիտական իմացութեան համար հսկայական գեր ունեն նաև անունները, հասկացութիւնները: Իր աշխատութիւններից մեկում նա գրում է. «առանց անուան ոչ գայ ի գիտութիւն», այստեղից էլ հանգում է այն եզրակացության, թե «ստեղծութեան» անհրաժեշտ է «նախ էութիւն, զի առանց էութեան ոչ ինչն ասի, բ. որակն հարկաւոր ի գոյ ստեղծութեան, դ. ձևք պիտոյանան գոյին, զի ամենայն ինչ եռակի տարրորշք են, դ. առ ինչք պիտոյանան ամենայնի... հինգերորդ՝ անունն ի վերայ ամենայնի...»⁴⁶: Վերջինիս կարևորութիւնը նրանում է, որ այն, «յայտնէ զբնութիւն իրին և տրոհէ միմեանց»⁴⁷: Այլ կերպ, անունների միջոցով մարդիկ տարբերում են բնութեան և հասարակութեան բազմաթիւ կողմեր, հարաբերութիւններ, հատկութիւններ ու հատկանիշներ: Զուղայեցին հետևելով տաթևյան դպրոցի առաջադիմական սկզբունքներին, բառ հասկացութիւնները համարում է օբյեկտիւ գոյութիւն ունեցող իրերի ու առարկաների պայմանական նշաններ և միաժամանակ գտնում, որ եթե փոխվում է դրանց դրսևորման ձևը, ապա համապատասխան փոփոխութիւն է տեղի ունենում նաև հասկացութիւնների մեջ: Նա գրում է. «զի իւրաքանչիւր իր յառաւել պիտանութենէն ընդունի ղանունակոչութիւն»⁴⁸:

Վկայակոչված դրույթներից պարզվում է, որ նյութով է պայմանավորված անունների, հասկացութիւնների գոյութիւնը: Սա արդեն նոմինալիստական առաջադիմական տեսակետ է, որի համաձայն գաղափարները, հասկացութիւնները երկրորդային են և արտացոլում են օբյեկտիվորեն գոյութիւն ունեցող իրերի ու առարկաների էական հատկութիւններն ու հատկանիշներն ամբողջությամբ: Նման գիտական դատողութիւններով, փաստորեն, Զուղայեցին դեմ է դուրս գալիս հասկացութիւնների գաղափարների առաջնութեան իդեալիստական տեսութեանը:

Այսպիսով, XIV դ. վերջի և XV դ. սկզբի մատենագիր Մատթեոս Զուղայեցին ցույց է տվել, որ գիտութեան ուսումնասիրութեան բնագավառը օբյեկտիւ իրականութիւնն է, որը քննելի է բանական իմացութեամբ: Հիմքում ունենալով Դավիթ Անհաղթի առաջադիմական դրույթներն ու սկզբունքները, նա ավելի հանգամանորեն է անդրադառնում գիտական իմացութեան մեթոդաբանական խնդիրներին: Զուղայեցին գտնում է, որ ուսումնասիրվող օբյեկտը ճիշտ հասկանալու, նրա էութիւնը գիտականորեն բացահայտելու համար ամենից առաջ հարկավոր է ուսման միջոցով ձեռք բերել տեսական որոշակի գիտելիքներ: Նրա ընկալմամբ՝ գիտական պատկերացումը ընդլայնում է մարդու իմացական հնարավորութիւնները, կատարելագործում բանական

45 Ձեռ. № 6607, էջ 212բ:

46 Ձեռ. № 2519, էջ 232բ:

47 Նույն տեղում, էջ 236ա:

48 Ձեռ. № 5871, էջ 39ա:

ու մտածողական կարողությունները: Զուլալեցին միանգամայն իրավացիորեն նկատել է, որ «կրթական իմաստությունը» հնարավորություն է ընձեռում մարդուն անսխալ ճանաչել բնության և հասարակության զարգացման բազմաթիվ կողմեր, հատկություններ ու հատկանիշներ: Միաժամանակ, նա կարողացել է ցույց տալ, որ մարդու անձնական և հասարակական տնտեսության կառավարումը, հասարակության տնտեսական կյանքի կարգավորումը իմաստության առանձին ճյուղ, հետազոտության հատուկ բնագավառ է:

Խոսելով հասկացությունների, գաղափարների մասին, Զուլալեցին կանգնում է արիստոտելյան ուսմունքի պաշտպանության դիրքերում, ելնելով տեսական այն սկզբունքից, որ անունները, գաղափարները ունեն նյութական օբյեկտ, հանդիսանում են այդ օբյեկտի ընդհանրացման արդյունք և երկրորդային են դրանց նկատմամբ: Նա միաժամանակ ցույց է տալիս, որ գիտելիքների գաղափարների ճշմարտությունը պետք է գտնել մարդկային փորձի և գործունեության մեջ: Այսօրինակ հարցադրում-լուծումներով Զուլալեցին իր տեղն ունի հայ միջնադարյան տեսական մտքի զարգացման գործում:

ВОПРОСЫ НАУКИ В ТРУДАХ МАТЕОСА ДЖУГАЕЦИ

М. А. ЕРАНОСЯН

Резюме

Матеос Джугасци занимает видное место в средневековой армянской историографии. Его перу принадлежат ценные исследования как по вопросам науки, так и многим социально-экономическим проблемам.

Согласно Джугаеци, предметом исследования науки является объективная действительность, которую можно распознать разумом. Джугаеци считал, что для научного обоснования изучаемого объекта необходимо прежде всего приобрести определенный багаж теоретических знаний.